

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

R J E Š E N J E

**po Prijavi namjere koncentracije između privrednih subjekata ASBISC Enterprises PLC,
Kipar i Megatrend d.o.o. za trgovinu i usluge, Sarajevo, Bosna i Hercegovina**

Sarajevo
Juli, 2008. godine



Broj: 01-05-26-014-12-II/08
Sarajevo, 24.07.2008. godine

Na osnovu člana 25. stav (1) pod e) člana 42. stav (1) pod d) u vezi sa čl. 12., 14., 16. i 18. Zakona o konkurenciji («Službeni glasnik BiH», br. 48/05 i 76/07), po Prijavi namjere koncentracije između privrednog subjekta ASBISC Enterprises PLC, Diamond Court, Kolonakiou 43, 4103 Limasol, Kipar, zastupanog po advokatu Tariku Kapetanoviću, Mehmed Paše Sokolovića 15, 71000 Sarajevo, Bosna i Hercegovina i privrednog subjekta Megatrend d.o.o. za trgovinu i usluge, Džemala Bijedića 162, 71000 Sarajevo, Bosna i Hercegovina zaprimljenu pod brojem 01-05-26-014-II/08 dana 23.04.2008.godine, Konkurencijsko vijeće, na 70. (sedamdesetoj) sjednici održanoj dana 24.07.2008. godine, je donijelo sljedeće

R J E Š E N J E

1. Ocjenjuje se dopuštenom koncentracija koja će nastati na tržištu prodaje računara i računarskih komponenti u Bosni i Hercegovini sticanjem kontrole kupovinom većinskog udjela od strane privrednog subjekta ASBISC Enterprises PLC, Diamond Court, Kolonakiou 43, 4103 Limasol, Kipar u privrednom subjektu Megatrend d.o.o. za trgovinu i usluge, Džemala Bijedića 162, 71000 Sarajevo, Bosna i Hercegovina.
2. Ovo Rješenje o koncentraciji upisuje se u Registar koncentracija.
3. Ovo Rješenje je konačno i bit će objavljeno u „Službenom glasniku BiH“, službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 23.04.2008. godine zaprimilo Prijavu namjere koncentracije broj 01-05-26-014-II/08 (u daljem tekstu: Prijava) privrednog subjekta ASBISC Enterprises PLC, Diamond Court, Kolonakiou 43, 4103 Limasol, Kipar (u daljem tekstu: ASBISC Enterprises ili Podnosilac prijave), zastupan po advokatu Tariku Kapetanoviću, Mehmed Paše Sokolovića 15, 71000 Sarajevo, Bosna i Hercegovina, po kojoj namjerava kupiti većinski udio u privrednom subjektu Megatrend d.o.o. za trgovinu i usluge, Džemala Bijedića 162, 71000 Sarajevo, Bosna i Hercegovina (u daljem tekstu: Megatrend).

Uvidom u podnesenu Prijavu utvrđeno je da ista nije uredna i kompletna, u smislu člana 30 stav (1) Zakona o konkurenciji (u daljem tekstu: Zakon) i čl. 8. 9. i 10. Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06) te je Konkurencijsko vijeće, u skladu sa članom 31. istog Zakona, zatražilo dopunu dana 26.05.2008. godine dopisom broj 01-05-26-014-2-II/08.

Predmetna Prijava je dopunjena dana 02.06.2008. godine dopisom broj 01-05-26-014-5-II/08, dana 02.06.2008. godine dopisom broj 01-05-26-014-6-II/08, dana 10.06.2008. godine dopisom broj 01-05-26-014-7-II/08, dana 18.06.2008. godine dopisom broj 01-05-26-014-8-II/08 i dana 24.06.2008. godine dopisom broj 01-05-26-014-9-II/08.

Konkurencijsko vijeće je dana 25.06.2008. godine dopisom broj 01-05-26-014-10-II/08 Podnosiocu prijave izdalo Potvrdu o prijemu uredne i kompletne Prijave (u daljem tekstu: Potvrda), u smislu člana 30. stav (3) Zakona.

Podnosilac prijave je naveo da nema obavezu podnijeti zahtjev za ocjenu koncentracije nekom drugom tijelu izvan teritorije Bosne i Hercegovine, u smislu člana 30. stav (2) Zakona.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Prijava namjere koncentracije je podnesena u zakonom propisanom roku, u smislu člana 16. stav (1) Zakona.

1. Učesnici predmetne koncentracije

Učesnici predmetne koncentracije su privredni subjekt ASBISC Enterprises PLC, Diamond Court, Kolonakiou Street 43, 4103 Limasol, Kipar i privredni subjekt Megatrend d.o.o. za trgovinu i usluge, Džemala Bijedića 162, 71000 Sarajevo, Bosna i Hercegovina.

1.1. Privredni subjekt ASBISC Enterprises

Privredni subjekt ASBISC Enterprises PLC, Diamond Court, Kolonakiou Street 43, 4103 Limasol, Kipar registrovan je 9. novembra 1995. godine pri Ministarstvu trgovine, industrije i turizma odjela registara privrednih društava i sudskog stečajnog upravitelja Nikozije, Republika Kipar. Vlasničku strukturu privrednog subjekta ASBISC Enterprises čine vlasnici dionica i to privredni subjekt Ks Holdings Ltd, Limassol, Kipar sa 46,26%, Maizuri Enterprises Ltd, Nikozia, Kipar sa 8,65% i Alpha Ventures s.a. Atina, Grčka sa 5,76 % i mali dioničari sa preostalih 39,33% dionica.

Osnovna privredna djelatnost privrednog subjekta ASBISC Enterprises je prodaja računara i računarskih komponenti i softvera na području srednje i istočne Evrope, zemalja Baltika, bivšeg Sovjetskog Saveza, Srednjeg Istoka i Sjeverne Afrike sa širokim asortimanom proizvoda koji se prodaju po principu „sve na jednom mjestu”.

Privredni subjekt ASBISC Enterprises nema registrovanih supsidijarnih društava u Bosni i Hercegovini niti direktno ili indirektno vrši prodaju svojih proizvoda na tržištu Bosne i Hercegovine.

1.2. Privredni subjekt MEGATREND d.o.o. Sarajevo

Privredni subjekt Megatrend 2000 d.o.o za trgovinu i usluge Sarajevo, Džemala Bijedića 162, 71000 Sarajevo, Bosna i Hercegovina registrovan je na Višem sudu u Sarajevu pod matičnim registarskim brojem 1-17402 dana 22.10.1996. godine. Dana 30.07.2003. godine izvršena je promjena u nazivu firme koja od tada nastavlja poslovati pod imenom Megatrend d.o.o. za trgovinu i usluge Sarajevo. Osnovni kapital privrednog subjekta Megatrend iznosi 10.000,00 KM, od čega je 5.100,00 KM, ili 51% udjela osnovnog kapitala, vlasništvo fizičkog lica Nine Strajher, Gornji Prnjavorac 4 A, Republika Hrvatska i 4.900,00 KM, ili 49% udjela osnovnog kapitala, vlasništvo fizičkog lica Zorana Pribičević iz Zagreba, Gramača 23, Zagreb, Republika Hrvatska.

Osnovna privredna djelatnost privrednog subjekta Megatrend je pružanje informatičkih usluga i prodaja računara i računarskih komponenti u saradnji s svjetskim i domaćim informatičkim firmama na tržištu Bosne i Hercegovine.

Privredni subjekt Megatrend je registrovan u Sarajevu i nema registrovanih poslovnica u drugim gradovima u Bosni i Hercegovini.

2. Obaveza prijave namjere koncentracije

Na osnovu ostvarenog godišnjeg prihoda učesnika koncentracije na dan 31.12.2007. godine proizašla je obaveza prijave namjere koncentracije, u smislu člana 14. stav (1) tačka a) Zakona.

Ukupni prihodi učesnika koncentracije na dan 31.12.2007. godine iznosili su:

Tabela 1.

Ukupni prihod	ASBISC		Megatrend
	KM	US\$	KM
Svijet	(..)* ¹	(..)*	-
BiH	-	-	(..)*

Ukupan prihod učesnika koncentracije privrednog subjekta ASBISC Enterprises ostvaren prodajom roba na svjetskom tržištu iznosi preko 100.000.000,00 KM po završnom računu u godini koja je prethodila koncentraciji, a s obzirom da je privredni subjekt Megatrend registrovan na teritoriji Bosne i Hercegovine učesnici koncentracije su bili u obavezi podnijeti Prijavu u skladu sa članom 14. stav (1) Zakona.

3. Pravni okvir ocjene koncentracije

Konkurencijsko vijeće je u provođenju postupka ocjene dopuštenosti predmetne koncentracije primjenilo odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterijima za ocjenu koncentracija privrednih subjekata.

4. Pravni osnov i oblik koncentracije

Pravni osnov koncentracije je Ugovor o kupovini osnovnog kapitala privrednog subjekta Megatrend (u daljem tekstu: Ugovor) zaključen dana 15.04.2008. godine u Limasolu, Kipar, između privrednog subjekta ASBISC Enterprises kao kupca i osnivača i vlasnika privrednog subjekta Megatrend fizičkih lica Nine Strajher i Zorana Pribičević, kao prodavaca.

Ovim Ugovorom privredni subjekt ASBISC Enterprises namjerava da kupi po cijeni od oko (..)*KM ((..)*EUR) 80% udjela u osnovnom kapitalu privrednog subjekta Megatrend od fizičkog lica Nine Strajher, kao dosadašnjeg vlasnika 51% udjela, udio od 41%, a Zorana Pribičević, kao dosadašnjeg vlasnika 49% udjela, udio od 39%.

Nakon okončanja transakcija Nino Strajher će zadržati 10% udjela u osnovnom kapitalu privrednog subjekta Megatrend, a Zoran Pribičević će prodati preostalih 10% udjela uposlenicima privrednog subjekta Megatrend od čega fizičkom licu Suvadi Fetahović 3,34 %, Adnanu Bajramoviću 3,33 % i Admiru Bajramović 3,33 %.

Vlasnička struktura privrednog subjekta Megatrend nakon provedene koncentracije bit će:

Tabela 2.

Redni broj	Naziv vlasnika udjela privrednog subjekta Megatrend	Visina vlasničkog udjela (%)
1.	ASBISC	80,00
2.	Nino Strajher	10,00
3.	Suvada Fetahović	3,34
4.	Adnan Bajramović	3,33
5.	Admir Bajramović	3,33
	U K U P N O	100,00

¹ (..)* - podaci predstavljaju poslovnu tajnu

Pravni oblik koncentracije podrazumijeva stjecanje kontrole privrednog subjekata ASBISC Enterprises nad privrednim subjektom Megatrend kupovinom većinskog udjela osnovnog kapitala u skladu sa članom 12. Zakona stav (1) tačka b) pod 1.

5. Relevantno tržište

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta, čini tržište određenih proizvoda/usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta relevantno tržište proizvoda obuhvaća sve proizvode i/ili usluge za koje potrošači smatraju da su međusobno zamjenjive s obzirom na njihove bitne karakteristike, kvalitet, namjenu, cijenu ili način upotrebe.

Nadalje, prema članu 5. Odluke o utvrđivanju relevantnog tržišta relevantno tržište u geografskom smislu obuhvaća cijelu ili dio teritorije Bosne i Hercegovine, na kojoj tržišni konkurenti djeluju u prodaji i/ili kupovini relevantnog proizvoda pod jednakim ili dovoljno ujednačenim uslovima koje to tržište bitno razlikuje od uslova tržišne konkurencije na susjednim geografskim tržištima.

Relevantno tržište proizvoda predmetne koncentracije je tržište prodaje računara i računarskih komponenti.

Relevantnim geografskim tržištem smatra se tržište Bosne i Hercegovine.

U tom smislu, relevantnim tržištem predmetne koncentracije smatra se tržište prodaje računara i računarskih komponenti na cijeloj teritoriji Bosne i Hercegovine.

6. Analiza relevantnog tržišta

Privredni subjekt Megatrend najveći dio svog prodajnog asortimana u 2007. godini prodavao je kupcima na cijeloj teritoriji Bosne i to privrednim subjektima QSS d.o.o. Sarajevo, KSK Tradeing d.o.o. Sarajevo, PING d.o.o. Sarajevo, S&T BA d.o.o. Sarajevo, Ava Com Group d.o.o. Mostar, NET d.o.o. Mostar, MMCC d.o.o. Sarajevo, Konzum d.o.o. Sarajevo, Abacus Computers d.o.o, Banja Luka, ALF-OM d.o.o. Banja Luka i BSP Brčko d.o.o..

Prema podacima iz Prijave tržišni udjeli privrednog subjekta Megatrend i glavnih konkurenata na tržištu računara i računarskih komponenti u Bosni i Hercegovini u 2007. godini su:

Tabela 3.

Redni broj	Naziv privrednog subjekta	Tržišni udjeli (%)
1.	Kim-Tec d.o.o. Vitez	28,00
2.	NT Computer Hardware Software-Sarajevo	19,00
3.	Bosnian Business Systems - Sarajevo	8,2
4.	Hermes SoftLab – Sarajevo-Banja Luka	5,5
5.	Megatrend	5,00
	Ostali	34,3
	UKUPNO	100,00

Iz navedenog proizilazi da tržišni udio privrednog subjekta Megatrend na tržištu Bosne i Hercegovine iznosi oko 5%, a pošto privredni subjekt ASBISC Enterprises na tržištu Bosne i Hercegovine nema tržišni udio neće doći do povećanja tržišnog udjela učesnika koncentracije na relevantnom tržištu.

7. Ocjena predmetne koncentracije

Konkurencijsko vijeće je, nakon procjene i analize podataka i utvrđenih činjenica u smislu člana 17. Zakona, u postupku donošenja predmetnog Rješenja, ocijenilo da provođenje predmetne koncentracije neće narušiti postojeću tržišnu konkurenciju s obzirom da privredni subjekt ASBISC Enterprises nije prisutan na tržištu Bosne i Hercegovine te da predmetna koncentracija vodi samo promjeni vlasničke strukture između učesnika koncentracije iz čega proizilazi da navedena koncentracija neće proizvesti promjenu tržišnih pozicija na relevantnom tržištu.

Konkurencijsko vijeće je utvrdilo da se predmetnom koncentracijom privrednih subjekata ne stvara i ne jača dominantan položaj na relevantnom tržištu prodaje računara i računarskih komponenti u Bosni i Hercegovini te je odlučilo kao u dispozitivu ovog Rješenja.

8. Administrativna taksa

Na ovo Rješenje podnosioc Prijave, u skladu s članom 2. tarifni broj 107. stav (1) tačka d) 1) Odluke o administrativnim taksama u vezi sa procesnim radnjama pred Konkurencijskim vijećem («Službeni glasnik BiH», broj 30/06), obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovog Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja odnosno od dana njegovog objavljivanja.

Predsjednik

Ibrica Lakišić